

## ՎՐԱՍՏԱՆԻ ԽՈՐՀՐԴԱՐԱՆԸ ՀԱՅ ԱՌԱՔԵԼԱԿԱՆ ԵԿԵՂԵՑԻՈՅ ՇՆՈՐՀԱԾ Է ԻՐԱՒԱԲԱՆԱԿԱՆ ԱՆՁԻ ԿԱՐԳԱՎԻՃԱԿ

Վրաստանի խորհրդարանը Յուլիս 1ին առաջին ընթերցմամբ փոփոխութիւններ մտցուցած է Վրաստանի քաղաքացիական օրէնսգրքին մէջ: Այդ փոփոխութիւններուն համաձայն՝ Վրաստանի մէջ կրօնական հինգ միութիւններու կը շնորհուի իրաւաբանական անձի կարգավիճակ: Այս մասին կը յայտնէ «Նովրսթի Կրուզիա» գործակալութիւնը:

Երեսփոխանները համապատասխան փոփոխութիւններուն թեր քուէարկած են խորհրդարանի արտահերթ նիստին ընթացքին:

Մասնաւորապէս, իրաւաբանական

անձի կարգավիճակ կը շնորհուի Հայ Առաքելական Եկեղեցւոյ, Կաթողիկէ Եկեղեցւոյ, Իսլամական համայնքին, Հրէական համայնքին եւ Մկրտչական Եկեղեցւոյ:

Օրինագիծին դէմ քուէարկած են ընդդիմադիր «Քրիստոնեայ-դեմոկրատական» խմբակցութեան անդամները:

«Վրացական եկեղեցին համանման կարգավիճակ չունի...: Մենք պէտք է հասկնանք՝ արդեօք Ազերպայճանն ու Հայաստանը կը պատրաստուի՞ն նման կարգավիճակ շնորհելու Վրացական եկեղեցւոյ...», ըսած է խմբակցութեան անդամ Նիքոլազ Լալիաշվիլի:

## «ԻՐԱՆ ԿԸ ՊԱՇՏՊԱՆԷ ԱԶԷՐՊԱՅՃԱՆԻ ՏԱՐԱԾՔԱՅԻՆ ԱՄԲՈՂՋԱԿԱՆՈՒԹԻՒՆԸ» ԿԸՍԷ ԼԱՐԻՃԱՆԻ

Ազերպայճանական «Սալամնիուզ» կայքէջի Յուլիս 1ին հաղորդած լուրին համաձայն, պաշտօնական այցելութեամբ Պաքու գտնուող Իրանի խորհրդարանի նախագահ Ալի Լարիճանի, յայտարարած է, որ «մեծ պետութիւնները» շահագրգռուած չեն հակամարտութեան կարգաւորմամբ:

«Մեծ տէրութիւնները հակամարտութիւններուն մէջ իրենց շահերը կը հետապնդեն: Հակառակ անոր, որ Միւսքի խմբակը արդէն երկար տարիներէ ի վեր կը զբաղի այդ հարցով (Արցախի), ոչ մէկ արդիւնքի հասած է: Իրան Ազերպայճանի տարածքային ամբողջականութիւնը կը ճանչնայ եւ կը պաշտպանէ: Կարաբաղեան հակամարտութիւնը պէտք է կարգաւորուի

ոչ թէ մեծ պետութիւններու միջնորդութեամբ, այլեւ տարածքաշրջանային ձեւաչափով», ըսած է Իրանի խորհրդարանի նախագահը:



## ԱԼԷՆ ԺԻԻՓԷ ԱՐՅԱՆԻ ՀԱՐՅԻՆ ՄԱՍԻՆ

Ֆրանսայի արտաքին գործոց նախարար Ալէն Ժիւփէ, Յուլիս 1ին, ռուսական «Էխօ Մոսքվի» ձայնասփիւռի կայանին հետ հարցազրոյցի մը ընթացքին յայտարարած է, թէ Լեռնային Ղարաբաղի տագնապի կարգաւորման առընչութեամբ, կողմերուն պիտի ներկայացուին լրացուցիչ առաջարկներ:

«Ես, ի հարկէ, կ'ողջունեմ Ռուսաստանի եւ անոր նախագահին ջանքերը: Մետվետեւ շատ ջանքեր ի գործ դրած է խնդրին առընչութեամբ թէ՛ Սոչիի մէջ, թէ՛ ալ՝ Քազանի: Սակայն ցաւալի է, որ այդ բոլորէն ետք որեւէ արդիւնք չէ արձանագրուած: Ամեն պարագայի, որքան գիտեմ, խնդրին առընչութեամբ որեւէ համաձայնութեան հասնելու համար պիտի տրուին լրացուցիչ առաջարկներ», ըսած է Ալէն Ժիւփէ:



## ԼՈՒՏՈՆԻ ՍՈՒՐԲ ՍԱՐԳԻՍ ԵԿԵՂԵՑԻՈՑ ԱՆՆԱԽԱՂԵՊ ԴԱՇՏԱՀԱՆԴԵՍԸ

Սուրբ Սարգիս եկեղեցին եւ քովի սրահը կառուցուած են 1922 թուականներուն, Տէր եւ Տիկին Գալուստ եւ Նուարդ Կիւլպէնկեանի կողմէ, թագաւորական թաղամասին՝ Քէնզինկիթրնի մէջ, այն տարիներու շուրջ 300 Հայերուն համար:

Այդ օրերէն մինչեւ այսօր, մեծ վաճառական Սարգիս Քիւրքճեան եւ իր երկու որդիները՝ Ճորճ եւ Ճոն մատուոին խնամակալութեան տեսնապետի հանգամանքով յաջորդաբար եւ յաջողութեամբ վարեցին իրենց պատասխանատու ազգանպաստ պաշտօնը:

Ներկայիս Ս. Սարգիս եկեղեցւոյ նոր ատենապետը՝ երիտասարդ բժիշկ Հրաչ Զիլինկիրեան իր սրտակոչ յայտարարութեամբ հրաւիրեց Անգլիոյ Հայերը մասնակցելու հաւատքի, յոյսի եւ սիրոյ կրօնա-ազգային հայանպաստ հաւաքոյթին:

Մեր հայրենակիցները ուրախութեամբ ընդառաջեցին եղած հրաւերին: Անոնք անտեսեցին տհաճ, անձրեւոտ օդը, նախ եկան ու լեցուցին փոքր եկեղեցին, ապա պատասպարուեցան բակը գետեղուած վրաններուն տակ:

Յիշատակութեան արժանի այս բացառիկ օրը ուրախառիթ անակնկալ մը եղաւ գաղթական հայ ժողովուրդին համար, տրուած ըլլալով որ Անգլիա ապաստան գտած Հայերը՝ շուրջ 25 հազար, եկած են զանազան երկիրներէ, մեծամասնութեամբ՝ Հայաստանէն:

Անցած տասը տարիներու ընթացքին, համահայկական քրիստոնավայել իմաստով, բացարձակապէս գաղթական Հայերը նման հրաւեր չստացան, եւ ոչ ալ հետաքրքրուող եղաւ իրենցմով նախորդ առաջնորդին՝ Նաթան Եպիսկոպոսի հանձնարարները: Այդ ճամբուն վրայ անոր ընկերակցեցաւ նաեւ եկեղեցական խորհուրդը, որ անցնող տասը տարիներու ընթացքին Առաջնորդին հետ միասնաբար յումպէտս հայապահպանութեան սանդիկ մէջ ջուր ծեծեց...: Անցնինք:

Այսպէս, Յունիս 12ին, յետ եկեղեցական արարողութեան, հինգ հարիւրի հասնող ներկաները տեղ գրաւեցին սեղաններուն շուրջ: Խրախճանք-դաշտահանդէսը սկսաւ նոր առաջնորդին՝ Վահան Մ. Վարդապետին սեղանօրհնէքի եւ բարի գալստեան խօսքերով:

Այդ Կիրակին, եկեղեցւոյ կից բաւարարական դրացիներուն կողմէ Հա-

յերուն տրամադրուած էր դաշտահանդէսին վայրը: Անոր կեդրոնը բեմի վերածուած բեռնատար կառքէն սրբառուած հայկական երգերն ու երաժշտութիւնը կը լսուէին շուրջի բարձր շէնքերէն անդին: Անհամբեր երիտասարդները սկսան արդէն պար բռնել անձրեւին տակ, հայկական ուրախ մթնոլորտ ստեղծելով: Վրաններուն տակ, կարօտաբաղձ հայրենակիցներ, սեղանէ սեղան, ոտքի վրայ, զիրար կը բարեւէին, կ'ողջագուրուէին, յուշեր կ'արձարծէին:

Վրանածածկ կրպակներուն մէջ, ժողովուրդին տրամադրութեան տակ դրուած էին հայերէն եւ օտար լեզուներով բազմաթիւ գիրքեր, նկարներ եւ երաժշտութիւն, իսկ վաճառողներու շարքին աչքառու ներկայութիւն էին հանրածանօթ անձնաւորութիւններ, ինչպէս ջութակահար Լեւոն Զիլինկիրեան եւ կինը՝ Սիւզըն Փաթի, որ «Հայ Հիմնակ» մշակութային միութեան ատենապետուհին է, պատմաբան Արա Սարաֆեան, շաբաթօրեայ եւ կիրակնօրեայ դպրոցներու հայերէնի ուսուցչուհի, երէցկին Տիկին Լէյլա Ներսէսեան, «Հայաշէն» կրթական եւ բարեսիրական հաստատութեան անխոնջ ատենապետը՝ Միսաք Օհանեան, Լոնտոնի համալսարանի հայերէնի դասախօս դոկտ. Գրիգոր Մոսկոֆեան եւ օփերայի երգիչ Արիս Նատիրեան:

Այս հիանալի տեսարանով կատարեալ հայկական մթնոլորտին մէջ, նորընտիր առաջնորդ Հայր Սուրբը՝ դոկտ. Վահան Մ. Վարդապետը եւ Անգլիոյ հայութեան հինէն ծանօթ Շնորհք Քհնյ. Պաղտատարեան ներկայութիւն միջեւ շրջագայելով բարի գալուստ եւ բարի ախորժակ կը մաղթէին բոլորին:

Դաշտահանդէսին պաշտօնական հիւրերն էին Քէնզինկիթրն եւ Չելսի թագաւորական թաղամասերուն քաղաքապետուհին՝ Տիկին Ճիւլի Միլզ, որ այցելեց նաեւ Ս. Սարգիս մատուռը, առաջնորդութեամբ եւ բացատրութեամբ դոկտ. Հրաչ Զիլինկիրեանի. եւ մասնաւորաբար Հայերու մօտէն ծանօթ եւ բազմաթիւ անգամներ Հայաստան եւ Լեռնային Պարաբաղ այցելած, զանազան հաստատութիւններու դրամական օժանդակութիւն կատարած, Անգլիոյ Պահպանողական կուսակցութեան անդամուհի՝ Պարօնուհի Գա-

րըլայն Քոքս, որոնք նաեւ խօսք առնելով դրուատեցին Հայերուն ներկայութիւնը Անգլիոյ մէջ:

Ծանօթ դերասան Գէորգ Մալիքեան յաջողութեամբ վարեց գեղարուեստական ճոխ յայտագիրը, որուն իրենց մասնակցութիւնը բերին «Ախթամար» պարախումբը, հայկական տարագնեւում, շաբաթօրեայ եւ կիրակնօրեայ դպրոցներուն աշակերտները: Հայկական աւանդական դհոլով եւ զուռնայով հանդէս եկան Արա Պետրոսեան եւ Տիգրան Ալեքսանեան: Ապա շարականներու երաժշտութեամբ յայտագրին մասնակցեցան Արիս Նատիրեան, Սեդա Թոքաթլեան, Անահիտ Եղոյեան եւ Գարին Յարութիւնեան: Իսկ «Հայ Հիմնարկ»ը մէջ ընդ մէջ ներկայացուց մանկական երգեր եւ պատմուածքներ ու Հայ լեզուն:

Դաշտահանդէսը վերջ գտաւ Անդաստանի շարականով եւ օրհնութեամբ:

Կիրակնօրեայ դաշտահանդէսին յաջողութեամբ պսակումը կը պարտինք նորընտիր Առաջնորդին, նոր ատենապետին, կազմակերպիչ յանձնախումբին, Ս. Սարգիս եկեղեցւոյ խնամակալութեան անդամներուն, ինչպէս նաեւ Տիկնանց միութեան անդամուհիներուն, որոնք անդադար, յոգնեցուցիչ սպասարկութեամբ հինգ հարիւրէ աւելի հանդիսականներ կերակրեցին:

Կը մաղթենք, որ անակնկալ դաշտահանդէսը դառնայ աւանդութիւն եւ տեղի ունենայ ամեն տարի:

ԱՅՆՃԱՐ

